

اودلی قیلینج

گونش دوغوردی. هاوا ایشیقلا ندیقجا، گردمان قلا سینین محتشم برجلاری آیدین گورونمه گه باشلا بوردی. اوزاقلاردا گوموش بیر کمر کیمی پاریلدایان کور چایی اوزانوب گئدیردی، کورین اطرافی مئشه لیک ایدی، گوز ایشله دیکجه اوزانان دوزلر یاشیللیق ایچینده اوزوردی. بورادا قدیم بابالاریمیزین ایله یارانمیش گوزه ل بیر آذربایجان شهری یئرلشمیشدی. هئج بیر یاندان سس سمیر گلیمردی، قوشلار بیله یوخودا ایدی. ایلك باخیشدا بو شهرده حیات علامتی گورونموردی.

ایله بیل وقتيله بورانی زینتله ندرین انسانلار چوخدان هارا ایسه کوچوب گتمیشدی. گردمان ساراینین قوجا کئشیکچی سی عادتلی اوزره یئنه ده گنیش حیاطده گزینیر، آرا-بیر دایانوب اطرافی دینله بوردی. بوردن او یاواش-آیدین ائشیدیلمه گه باشلایان باغیرتی و قیلینج سسلرینه دیکسینوب اطرافی دقتله دینله مه گه باشلادی، ایله بیل ایکی بویوک دسته نعره چکوب بیر-بیریه اولوم-دیریم ویریشینا گیرمیشدی، قوجا، شهره دشمن قوشونی دولوشدیغینی ظن ائدیپ حکمدارینه خبر آپارماق ایسته دی، بو آندا ویریشانلار حیاطده گوروندیلر.

قوجا کئشیکچی قهقهه چکوب گولدی، قوشون حساب ائتدیگی آدمالار یالینیز ایکی نفر ایدی، اونلاردان بیری دال-دالی چکیلیر، او بیری ایسه ایلدیریم کیمی قاباغیندا کینین اوستینه شیغیردی. اونلار قوجانین بوردا اولماسیندان خبر سیزدیلر، اونین قهقهه سینی بئله ائشیتیمردیلر چوخ قیزیشمیشدیلا پولاد قیلینجلار یئنیجه دوغان گونشین قیزیل شعاعلارینی عکس ائده رک پاریلدا شیردی.

ویریشان گنجلرین اوزی گولدی.

ایره لیله دوغرو شیغیان دلیقنلی گردمان حکمداری ((واراز)) ین اوغلی ((جوانشیر)) ایدی. اونلار قیلینج دوگوشدیریب مشق ائدیردیلر. قوجا کئشیکچینین گولوشی بوردن کسیلدی، بئله گئتسه یاخشلی تانیدیغی بو گنجلر بیر-بیرینی هلاک نایده بیلر دیلر. جوانشیر قاباغیندا کی اوغلانا محکم بیر ضربه اندیره رک، اونین قالخانی یارییا بولدی: - آت یئر قیلینجینی، اورموز!- دییه باغیردی:- ارنلر اوچه تن دئمیشلر... بونینلا سن اوچ دفعه دیر مغلوب اولوبسان...

قوجا کئشیکچی یالینیز ایندی گوروب اوتانان اورموز جوانشیرین غلبه سینه دوزمیوب اعتراض ائدی:

- یوخ، بو اولمادی، آیاغیم داشا توخوندی. سن هله یالنیز ایکی ضربه اندیرمیشسن... من قصداً خاطرینه دگمیره م.

جوانشیرین دوداقلاریندا کی تبسم ایزلری سیلینوب یوخ اولدو.
- بو بهانه دیر، دوستوم، - دئدی.

اونلار یئنه ویریشماغا حاضر لاشارکن، قوجا کئشیکچی جوانشیره یاناشدی:
- من دعوانیزی آیرد ائده رم - دئدی.

قیلینجلار یئنه پاریلدادی، اورموزین ضربه سی چوخ ناگهانی اولدی، جوانشیر ایکی آددیم گئری چکیلدی پرت حالدا گوزلرینی دوغدی:

- باخ، بونا سوزیم یوخدیر، - دئدی. ویریشارکن اوزون دانیشماق منه چوخ بها اوتوردی.
قوجا کئشیکچینین ایشه قاریشماغینا احتیاج قالمادی. جوانشیر الینده کی قالخانی اوزونده ن کناره آتاراق اورموزین اوستینه جومدی.

- آل، بودا اوچ!- دییه سئوینجله باغیر اراق اورموزا محکم ضربه ووردی- ایندی راضیسانمی؟
اورموز بو ضربه دن گوجلله اوزینی دوغرولتدی قیلینجینین اوجونی یئره دایادی چیگنینین آغریسینی اونوتماق اوچون قوللارینی دورد- بئش دفعه هاوادا فیلاتدی:
- چوخ گوزه ل- دئدی- من سنین مهارتینی اوره کدن تصدیق ائدیره م. بویوک حکمداریمیز وراز دوغرودان دا خوشبختدیر، اونین سویمه لی اوغلی جوانشیر ایندی گردمانین ایگید سرکرده سی اولماغا دوغرودان دا لایبقدیر... گل، گل اوزوندن اوپوم!

قوجا کئشیکچی قیلینج مشقینین بئله قالماقالسیز قورتارماغینا سئوینردی، اونین صدف کیمی آغ دیشلری پاریلداییر، ایری آلا گوزلری درین بیر صمیمیتله آلیشوب یانیردی. گردمان داغلارینین تمیز هاواسیندا بویوموش بو قوجا یتمیش ایل یاشامیشسادا، هله قوجالیقدان شکایت اتمیردی، او جوانلارین بئله دوستجاسینا اوپوشدیکلرینی گوره رکن سئوینجدن یاشاران گوزلرینی سیلدی و جوانشیره یاناشدی.

- اوغلوم- دئدی- دشمن بیرده اوستیمیزه قیلینج قالدیرسا، گردمان داغلارینین هئچ نه دن قورخوسی یوخدور، وراز قوجالوب گوجدن دوشسه ده جوانشیر ساغ اولسون!

بیردن هاراداسا شیپور چالیندی، چوخ کئچمه میش گردمان جنگاورلری بویوک میداندا دنیز کیمی دالغالانوب تلاطمه گلدی.

وطنین آیدین سیماسی قارا بولوتلار اورتنده همیشه بئله اولاردی، شیپور سسلری هامینی چاغیراردی. گردمانین ایگید سرکرده سی میداندا دیک بیر یئرده گورونوردی. اونین بیر سوزی ایله بو انسان دنیزی بیر سمته دوغرو آخاردی. ائولرین دامینا چیخمیش آلا گوزلی شمشاد بویلی قیزلار - گردمانین بو غنیرسبز گوزه للری - ماهنی اوخویار و ووروشما میدانینا یولا دوشنلره خیر دوعا وئره ردیلر. اونلارین ماهنی سسیندن داغلار دره لر بئله وجده گله ردی. اولوم سوزینین نه دئمه ک اولدیغینی بیلمه ین گردمان ایگیدلری ووروشما میدانیندا بیخیلوب حیاطلا وداعلاشیرکن ((ابدیته قووشدوق)) دیردیلر.

ایندی ده شیپور چالیندی. ایندی ده گوزلر سرکرده یه زیلله ندی، قوجا وراز اؤز یاخین آداملاری ایله برابر گلدی. گردمانین آناسی، ورازین اوزون و کشمکشلی حیاتینین مهربان یولداشی جواهر خاتون دا گلدی.

انسان دنیزی سکوته غرق اولدو. وراز سوزه باشلادی. اونین سسینده غریب بیر اومودسزلیک و یازیق بیر تیتره ک واردی. هامی جبهه لر یارمیش بو قوجامان سرکرده نین سسینی ائشیدنده فلاکتین بویوک اولدیغینی آنلادی.

واراز دئدی:

- عزیز اولادیم، بو قوجانین سوزلرینه دقتله قولاق آسین! مقدس گردمان اؤلکه سی بیزدن وفا ایسته بیر. اودور، یئنه اوستوموزه دشمن گلیر، چاپوب تالایان، ووروب بیخان، انصاف دیبه نده، قیلینچ چکه ن، ناموس دیبه نده، اود یاغدییران بیر یاغی وار. اونین آدینا((وحشی خزر)) دئییرلر. اوستوموزه قان گلیر، اولوم گلیر. منده سبزه سون بورجیمی وئرمه گه گلدیم، اوتوز ایلده همیشه اولوم بیزدن اوزاق اولدی، ناموسیمیز تاپدانمادی، گردمان آدی گلنده، هامی اطاعتله باش اگدی. اما ایندی من قوجالمیشام، بوگون سحر اوخ سوزدوروب قیلینچ چالماق ایسته دیم، اللریم تیتره دی، ســـــر کرده نیـــــز کـــــیم اولاجـــــاق! گوســـــترین! آغ ساچلی، نورانی بیر قوجا، حکمدارین اونینده احتراملا باش اگدی: - اولو حکمدار!- دئدی،- اؤزون گوستر. اوتوز ایلده دوستیمیزی دا، دشمنیمیزی ده تانیان سنسن، کیم سرکرده اولسا، ایگیدلریمیز اونین بیر سوزی ایله داغلاری یئریندن اویناداجاقلار.

واراز نورانی قوجانین اوزونه حرمت ائتدیسسه، سوزینه باخمادی. ائلین سسین دینله مک ایسته دی:
- کونولیلر میدانا چیخسین،- دئدی.

بو آندا اورموزین قیلینجی پاریلدادی. او، ورازین قارشیسیندا اگیلدی، تعظیم ائتدی، قیلینجینی
اویناتدی:

- بویوک حکمداریمیز!- دئدی،- من آرتیق یئتگین بیر جنگاورم، سرکرده لیک قیلینجینی منه
وئرین!

واراز اونون جسارتیندن راضی قالدیسادا، فکرینه شریک اولمادی.

- ایگید اوغلوم،- دئدی،- سن هله جوانسان. سرکرده یه قیلینجی حکمدار وئرمه ز، ووروشما
میدانی وئره ر.

اورموز بیر دها دینمه دی، حکمدارین سوزلری اونی قانع ائتدی. سونرا جوانشیر میدانه چیخدی.

- منیم ده سوزیم واردیر، آتا،- دئدی، دشمن سرکرده سینین گوموش دسته کلی قیلینجینی
آلاجیما سوز وئریره م.

واراز اوغلونون دا جسارتین بگه ندی، اما اونی دها چتین سیناقدان کئچیرمه ک ایسته دی.
- بلکه بیردن او سنی مغلوب ائتدی؟

جوانشیر سسینی اوجالتدی، بویوک بیر غرورلا جواب وئردی:

- کور چایی دایانار، وراز اوغلو باسیلماز!- دئدی.

هامی جوانشیره افتخارلا باخدی، وراز ایسه، تجربه سیندن بیلیردی کی، چوخ زمان قشنگ سوز
دئمه گی باجاران آداملار، چتین حاللاردا قهرمانلیق گوسترمکدن عاجز اولورلار. جوانشیره دقتله
باخدی، سونرا دونوب جواهر خاتونین رایینی بیلمه ک ایسته دی.
- اوغلون سرکرده اولماق ادعاسیندایر، سن نه فکرده سن؟
جوانشیرین مهربان آناسی دینمه دی، وراز یئنه اوغلونا باخدی، اورموزا دئیگینی تکرار ائتدی:-
هله جوانسان، اوغلوم! دئدی.

جوانشیر آتاسی ایله راضیلاشمادی. هامی ائشیتسین، دییه، سسینی داهادا اوجالتدی:
- اون دورد یاشلی بیر حکمدار تانییرام کی، قانلی ووروشما میدانیندا دشمن سر کرده سینین باشینی
بدنیدن آبیردی.

واراز تجربه لی سر کرده ایدی:

- قوشونین باشچیسی اولسه ده، محکم قوشون داغیلماز!- دئدی.

جوانشیر چوخ سکوته دالیدی، آتاسینین بو فکرینی ده جوابسیز قویماق ایسته مه دی:
- من دشمن سر کرده سیله قوشونینی داغیتدیقدان سونرا قاباقلاشاجام، دئدی.
واراز ایسته کلی اوغلونون چوخ عقیللی بیر گنج اولدیغینی یاخشی بیلیردی، لاکن اونین بو
جوابلارینی ائشیتدیگدن سونرا، جوانشیره محبتی داهادا آرتدی.

- ایله ایسه، تدبیرینی سویله، اوغلوم،- دئدی.

- ووروشمانین سونینی گوزلرسن، آتا!- دییه جوانشیر یئنه غرورلا جواب وئردی.
سونرا وراز اوزونی خلقه توتاراق سوروشدی:

- اولادلاریم! سیز نه دئییر سینیز؟

- راضیق، راضیق!- دئدی.

ایله ایسه اوغورلار اولسون، بالا... اونوتما کی، گردمان تورپاغینین سرحدی کور چایینین اوتاییندان
باشلانیر.

- بونی بیلیرم، آتا... قوی مهربان آنام منه خیر دعا وئرسین.

بوتون خلقین گوزی گردمانین آناسی جواهر خاتوندا ایدی، اونون هر بیر کلمه سینی یاخشی دینله
مک اوچون هامی بوتون دقتینی اونا وئردی.

جواهر خاتون دئدی:

- ایندی ده منیم سوزلریمی دینله، اوغلوم، بیر زمان، هله سن اوشاق ایکن دعواده، دشمنین پولاد
قیلینجی منی سینه مدن یارالادی، من آغلادیم، اوغلوم! ((جوانشیریم ساغ اولسون)) دئدیم، ائوه
قاییتدیم. سنین سینه نی تازه آل قانیملا بویادیم. من دواسیز- درمانسیز ساغالدیم. سن ده

بویوب ایگید اولدین، ایندی ووروشما میدانینا گئدیرسن. آتانی دا، منی ده سن عوض ائدیرسن. چالیش کی، دشمن سنی آرخادان وورماسین، سینه دن آلدیغین سنه اولوم یوخدور، آنانین صاف قانینا خنجر باتماز.

آنانین خیر دعاسینی ائشیدندن گردمان جنگاورلری قیلینجلارینی قینیندان چیخاروب هاوادا اویناتدیلار.

- ساغ اولسون آنامیز!- دئدیله.

سونرا جوانشیرین سسی ائشیدیلدی:

- ایگیدلریم!- دئدی،- آتام منی جوانسان سوزی ایله یولا سالیر، آنامین خیر دعاسی ایسه، قوللاریم قووت، گوزلریمه ایشیق وئریر. آنام بیزی امتحانه چکیر. منیمده شرطیم وار هر ساعتده یئددی قاصد محاربه میدانیندان آنا خبر گتیرسین. باخ، بورادا، گردمان سارایینین قارشیسیندا ایکی جرگه دلیقانی دوزولسون، بو جرگه نین بیرینده یئددی اوغلان، الینده قیلینج-خنجر، او بیرینده ایسه، یئددی قیز، الینده گول-چیچک، دایانسین. مغلوب اولوب قایتسام، قوی او یئددی جنگاورین هر سی منه ساغالماز بیر یارا وورسون، غالبته گئری دونسه م، یئددی قیز اوستیمه گول-چیچک سه پسین...

واراز بو شرطه راضی اولدو.

- اوغلو،- دئدی،- دشمنین قارا دیرناقلی آتلاری کورون مقدس سولاریندان بیر داملا بیله ایچرسه اونوتما کی او قیلینج یارالارینی سنه یئددی ایگید یوخ، بوتون گردمان اولکه سی ووراجاقدیر. اوستون گلسه ن، اوستینه او گوللری، چیچکلری بوتون گردمان سه په جک. جوانشیر قوجا آتاسینین بو سوزلریندن داهادا روحلاندى.

- اوغوریمیز خوش اولارسا، یئنه ده بورادا گوروشه ریک، آتا،- دئدی.

اونین آغ دیرناقلی کهلن آتین گتیردیله. جوانشیر آتا- آناسینین الیندن اوپوب، جلد آتا سیچرادی. کهلن آت شاهه قالخدی.

گردمان جنگاورلری اونى بو حالدا گوره رکن، دونیالر قدر سئویندیله. جوانشیر مهربان آتاسی وارازه به نزه بیردی.

حرکت شیپورلادی. گورلادی داغلار، دره لر تیتره دی ، جوان سر کرده نین قوشونی حرکت گنده،
واراز گوزلرینده کی سئوینج یاشلارینی سیلدی.

- الله سنه یار اولسون، اوغوم! دئدی.

بیر هفته کئچدی. جوانشیرین قاصدی گلمه دی. قوجا ورازین صبری توکندی.
- کیم بیلیر، بلکه ده بوتون قوشون اسیر دوشموشدور؟

آنا اوره گی بو آغیر حکمه دوزمه دی، جواهر خاتون دئی:

- صبر ائت وراز! سن قوجالیدیغا، حکمدار اولدیغینی اونودورسان...

بو آندا سارایین یاخینلیغیندا یئل قانادلی بیر سوار گوروندی، جواهر خاتون اونی هامودان اول
گوردی.

- او، جوانشیرین ائلچیسیدیر،- دئدی.

هامو درین بیر هیجان و انتظارلا آتلی گلن سمته باخدی، قاصد گلوب آتدان دوشدی و حکمدارلا
جواهر خاتون قارشیسیندا تعظیم ائتدی:

- مرد سر کرده میزین ایلک قاصدیم،- دئدی،- دشمن کورچاینین بری تاییندا ایدی، اوستیمیزه
اوجسوز- بوجاقسوز نیزه لر دیزی آخوب گلیردی. سر کرده جوانشیر گوزله دی، دشمنی یاخینا
بوراخدی، ایلک حمله ده دشمندن یکی یوز و بیزدن ایسه اوچ یوز ایگیدین قانی کورچاینین
سولارینی قیرمیزی رنگله بویادی، ووروشما گئت- گنده داها دا قیزیشیر. دشمن بیزدن اون قات
گوجلودور، خزر سر کرده سینین قارا دیرناقلی آتی انسان قانینا حریمدیر.
وارازین قاشلاری چاتیلدی، دوداقلارینا خفیف بیر تیتره یش سیزیلدی.
- گئت اوغوم،- دئدی،- بو آجی خبری ائشیده ن آنالارین اوره گی قانا دونمه سین!...

قاصد یئنه تعظیم ائتدی.

- بویوک حکمدار،- دئدی،- ایکینجی قاصده ایندیجه گلر.

گتیریلن خبردن کدرلنمیش جواهر خاتون، حمدارین اطرافینه توپلاشمیش اوغلانلارا، قیزلارا
اوزونی دوتدی:

- جوانشیر،- دئدی،- بیرینجی شرطه عمل ائدوب قاصد یوللادی، گردمان ایگیدلری، سیزده اونون
ایکینجی شرطینه عمل ائدین!

بویوک آنانین مقدس حکمینه عمل اولوندی، گنجلر ایکی جرگه دوزولدیلر. بیر یاندا قیلینجلار
پاریلدادی، بیر یاندا ایسه، گوللر- چیچکلر عطر ساچدی.

چوخ کئچمه میش جوانشیرین ایکینجی قاصدی اؤزینی یئتیردی.

- بویوک حکمدار!- دئدی،- بیر گردمان جنگاوری دشمن سرکرده سینین قارشیسینا چیخدی،
آتین قانتارغاسیندان توتوب ساخلاماق ایسته دی، کافر دشمن قیلینجلا جنگاورین قولینی کسوب
آتدی، جوانشیر نعره چکدی: ((ای، قورخ کی سن، باشینی ده ایتیرمیه سن!))- قانلی ووروش
کئت- کئده دونیانی بورویه ن مدهش بیر طوفانا بنزه بیر. دشمن ییزدن اون قات گوجلودور...
وارازین قانی باشینا ووردی. اونین گوزلرینده دنیا قارالادی، او تیتره یه ن الینی قیلینجا آتدی.
- اوخ،- دئدی- جوانشیر، جوانشیر... من اوتوز ایلده بئله آجی خبر ائشیتمه میشدیم.
ایکینجی قاصد اونا تسلی وئرمه ک ایسته دی.

- بویوک حکمدار صبر ائدین.

- جوانشیر مغلوب اولارسا، اؤزوم قیلینجا ساریلاجاغام،- دییه قوجا وراز یارالی بیر آسلان کیمی
نعره چکوب یئری- گویی تیتره تدی، بو آندا اوچینجی قاصد آتیندان دوشه رک یارالی حالدا
سلدیره یه- سلدیره یه گلدی، گوجلہ اوزینی دوغرولدراق، قیلینجینا دایاندی، تعظیم ائتدی.
- بویوک حکمدار،- دئدی،- جوانشیر دشمن سرکرده سیله قاباقلاشدی. او، قارا دیرناقلی آتینی
عزیز اوغلونیزین اوستینه سکیر تدی. اگری قیلینجینی دوز اونین باشینا اندیردی. جوانشیرین آتی
بیردن کناره سیچرادی و بیردن دائره ووراراق اؤزینی دشمن سرکرده سینین اوستینه آتدی. بیرده
ن نه گورسه ک یاخشیدیر؟ بدنن آیریلیمیش بیر باش هاوادا فیرلانیر...

قوجا ورازین اوره کینده اوغول محبتی جوشدی.

- او کیمین باشی ایدی؟- دییه صبرسیزلیکله خبر آلدی.

بو سوآلی سانکی هامو بیردن تکرار ائتدی.

- او کیمین باشی ایدی؟

قاصد نفسینی دردی. اونین قانلی دوداقلارینا خفیف بیر تبسم اوینادی.

- بویوک سرکرده میز جوانشیرین اودلی قیلینجی وحشی خزرین کله سینی قارا دیرناقلی آتیندان اون آددیم کنار آتدی. سونرا جوانشیر بیر اووج سواری جنگاوریمیزله مئشه طرفدن دشمنین آرخاسینا هجوم چکدی، قان سو یئرینه آخوب یاشیل دوزلری باسدی. گردمان ایگیدلری دوزلری حلقه ایچریسینه آلوب دشمنی گئری قاچماغا قویمادیلار. ایندی اونلار ایلدیریم مثالی قیلینجلارلا دشمن عسکرلرینی بیچیب توکورلر.

بویوک آنانین سئوینجی یئره- گویه سیغیشمیردی، چتین سیناقدان چیخمیش اوغلونین یارالی قاصدینه باخاراق یئنه امر ائتدی:

- قیزلار- دئدی- بو شاد خبرلی ائلچینین یارالارینی باغلایین، اونین سینه سی دشمن قیلینجینا قالخان اولموشدور.

قاصدین گوزلری سوزولدی.

- یوخ بویوک آنا!- دئدی- لازیم دئییل. من بیر دقیقه دن سونرا ابدیته قووشاجام، اوف... سو... آلا گوزلی گردمان دلبری بوز کیمی سویوق چشمه دن سو گتیروب یارالی جنگاوره وئردی او ایچدی و سوزونه دوام ائتدی.

- ایندی منیم سون سوزیمی دینله یین- دئدی- سرکرده جوانشیره مندن سلام یئتیرین ... دئیین کی...

بو آندا ماوی گویلرده اوزون بیر دورنا قاطاری گوروندی، جنگاور اونلارین قافقیتیسینی ائشیتدی، سون قووتینی توپلایاراق اوزونی اونلارا ساری توتدی:

- گویده اوچان ایپک قانادلی دورنالار! من داغلار قوینوندا کی طالستان کندیندم، بوردان بیر باش بیزیم شنلیگه اوچون! انتظارلی آنالار، مهربان باجیلار، آل یاناقلی قیزلارا سویله یین کی، من اونلارین یولیندا ابدیته قووشدیم. منه هئچ بیر زمان اولوم یوخدور!

او دوغرودان ابدیته قووشدی، دورنا قاطاری اوزاقلاشدی داغلار قوینونداکی طالیستانا اونون سلامینی آپاردی...

يئنه شىپور سسلرى گورلادى، ايندى جوانشىر اۋزى گرمان ايگيدلرى ايله برابر قايدىردى. ورازىن آلاو كىمى يانان گوزلرينده اوغلوين غلبه سىندن بير افاده وارايدى. او، جوانشىر هله آت بئلىندە ايكن، سوروشدى:

سويله، اوغلو، سويله منىم كورپه پلنگىم، دشمن آتلارى كور چاينىدان سو ايچه بىلدىمى؟ جوانشىرىن كهلن آتى شاهه قالخدى، بويوك بير قىلىنجلار دىنيزى گونشىن آل شفقلىرىنى عكس آندىردى، هامو اود كىمى پارىلدايان قىلىنجلارا حكمدارا جواب وئردى، جوانشىر دىلله ندى. - آتا: - دئدى - قارا دىرناقلى كافر آتلارى آنا وطنىن مقدس كور چايلارىندان ايچه بىلمه دى، لاكلن دشمنلر اۋزلىرى بو سولاردان دويونجا ايچدىلر.

سونرا ورازىن سسى اوچالدى:

- گرمانا هئچ بير وقت اۋلوم يوخدور... اولادلارىم وراز اۋلسه ده، جوانشىر ياشاير... - دئدى. آلا گوزلى قارا تئلى شمشاد بويلو دلبر قىزلار، جوانشىرى چىچك دىنيزىندە اوزدوردىلر، اما يئنه اونون اودلى قىلىنچى پارىلدايىردى...

تارىخ مىلادىنىن يئددىنچى عصرىندە پارلامىش بو قىلىنچ اولدار يوردىنىن شىرتىنى بوتون دىيايه تانىتدى.

حسین مهدی

XX

گجیل

<http://Gajil.20m.com>